





HARANGVE

FVNEBRE, PRONON-
CEE A PARIS EN
l'Eglise de Saint Merry , au
seruice de HENRY III. Roy
de France & de Nauarre, Prince
incomparable.

*Par F. N. DESLANDES, Do-
cteur, Regent, en Theologie, de
l'Ordre des Freres Prescheurs.*



A PARIS,

Par FRANÇOIS HUBY , rue saint Iac-
ques au soufflet vert, deuant le College de
Marmoutier: Et en sa boutique au Palais
en la gallerie des prisonniers.

M. DC. X.

Avec Priuilege du Roy.

Case

F

39

.326

1610d

THE NEWBERRY
LIBRARY



HARANGVE FVNEBRE,
prononcée à Paris , en l'Eglise de
S. Merry, au seruice de HENRY
IIII. Roy de France & de Na-
uarre, Prince incomparable.

Quomodo cecidit potens qui saluum fa-
ciebat populum? i. Mach. 9.

QV i pourroit exprimer la
 cuisante douleur dont fut
 atteint ce venerable Pa-
 triarche Iacob, voyant la robe de
 son mieux aimé Ioseph toute des-
 chirée & rouge de sang, & enten-
 dât à l'entour de luy ses enfâs esplo-
 rez luy criant tous d'vne voix que
 la beste cruelle l'auoit deuoré? Mais
 qui diroit vne plus forte douleur dôt
 est faisie la pauure France, voyant

H A R A N G V E

non la robe, mais le corps, non d'un
 fils , mais d'un pere, non d'un pe-
 tit berger , mais du Roy le plus
 puissant du monde, malheureuse-
 mēt depuis n'aguieres deuoré parla
 plus cruelle furie qui ait iamais esté.
 Ah Noblesse Romaine, si tu as re-
 ceu de l'emotion , voyant la robe
 de ton Cesar percee de coups, &
 teinte de son sang: Que dois-je res-
 sentir , voyant le corps de mon
 H E N R Y, cruellement nauré? Ce-
 luy-là t'auoit osté la liberté, celuy-
 cy me l'auoit renduë. Je dois pleu-
 rer sans comparaison , puis que
 mon mal ne se peut comparer à un
 autre. Qui fournira donc des lar-
 mes à mes yeux? Les pleurs doiuent
 estre sans mesure ou le mal ne se
 peut mesurer, & les discours lugu-
 bres des ennuys infinis ne se doiuent
 tenter que sous la faueur , & l'assi-
 stance de l'esprit infini. Parquoy

*Quis ergo
 dabit ca-
 piti meo
 aquam?*

deuant que de passer outre, i'implore le secours de sa grace par les merites de celle qui a esté son sacré temple, luy presentant à ce dessein le salut que luy annonça l'Archange.

Comme le bon Tobie, que le defastre commun de sa patrie auoit rendu captif en vn pays estrange, se pensoit vn iour donner quelque relasche, & faire vn peu de trefues avec ses ennuis, ayant à ce dessain disposé vn festin, & enuoyé son fils pour y semondre tous ceux qu'il pourroit descouurir de sa nation, il est tout estonné qu'il le voit reuenir les larmes aux yeux, le battemēt au cœur, l'effroy par tout le corps, & ces paroles à la bouche : Laissez mon pere vostre repas, il ne faut plus parler de ioye, i'ay trouué vn de nos freres esgorgé dans la rue. Et

H A R A N G V E

lors ie vous laisse à penser, auditeurs Catholiques quel sentiment de douleur eut ce bon personnage. Mais non, ne pensons pas à son ennuy, gardons tout ce que nous aurons de forces pour soustenir (s'il se peut soustenir) celuy dont nous auons à parler: celuy, disie, que cōme vn ieune Tobie les sâglots au cœur, le regret en l'ame, & les larmes aux yeux ie vous viens annoncer. I'ay veu vn corps atteint d'vne mortelle playe, & au milieu des rues de ceste ville Royale, aux iours de nos plus fortes lieffes. Mais pleurt à Dieu qu'vn autre eust à vous dire, & qui est le deffunt, & qui a fait le coup ! mais où le prendroit-on ? Ce ne seroit à mon iugement en toute la France, n'y ayant aucun de tous les bons Frâçois qui neresente si viuement ceste grande douleur, qu'il ne luy reste pas des forces pour la dire. Quoy? vous

iray-ie dire que ce corps malheureusement nauré, est le corps non de nostre frere, mais de nostre pere? non d'un homme cōmun, mais de nostre grand HENRY, mais de l'oinct du Seigneur: de celuy de qui les actions, ie ne veux pas dire plus excellentes que celles de tous ses deuanciers, mais du moins pour nous estre plus recentes, & sensibles, sont plus auāt placées en nos affectiōs, Ah perte insupportable! Le monde ne pourroit plus aisément soustenir l'absence du Soleil, ny vn corps de son ame, que la France d'estre priuée d'un si genereux Prince. Prince qui auoit peu, comme vn brillant Soleil, escarter nos tenebres, & comme vne vraye ame nous maintenir la vie, à l'heure que nous ne semblions en auoir que pour nous la raurir. Paris, il t'en doit souuenir, que tu perissois, que dis-ie? tu estois desia per-

HARANGVE

duë, quand tombant sous ses victorieuses armes, tu te vis heureusement releuee par la bonté de ce Prince, qui se contentant d'auoir vaincu, te rendit non seulement les biens & l'honneur, & la vie, mais mesme, ce que iamais au parauant luy personne n'auoit fait, voulut que la seule peine des combats luy demeurast, se priuant des lauriers que sa valeur luy auoit legitimement acquis pour en honorer, & ton front, & celuy du reste de la Frâce. Ah nous le pouuons bien dire, que ce pere nous estant osté, nous sômes demeurez orphelins! C'estoit bien voirement le pere de la France, plus naturel que ne fut iamais pere à son enfant: c'est celuy qui pour nous, contre nous, tousiours victorieux, & non iamais vaincu, a eu plus de resolution à la poursuite de nostre bien, que

Pupilli facti sumus absq; patre.

que nous n'auons eu d'opiniatreté
à la recherche de nostre ruine.
C'est celuy qui par vne paternelle
clemence, a sceu non apres, mais
deuant que nous recogneussions
nos fautes, nous ouurir les bras,
nous tendre le sein, & faire iouir du
paisible repos que son labeur nous
auoit acquis. C'est celuy qui con-
tent de la peine du gouuernement
nous en laissoit les fruiçts. Ha! furie
d'Enfer, monstre abominable,
comment s'est-il peu faire que tu
n'ayes eu le cœur attendry par de
si grandes douceurs? Tu as tué ce-
luy qui faisoit viure la France. Qui
t'auroit peu mouuoir? Ce malheu-
reux conseil d'où seroit-il sorty?
Ce n'est pas de la terre, encor
moins du Ciel: La terre l'honoroit
comme le plus grand Prince, & le
plus genereux qui fut iamais au
monde: & le Ciel luy estoit si libe-

H A R A N G V E

ral de ses faueurs , que l'on eust dit
 que Dieu le menoit par la main en
 toutes ses affaires, tant elles luy reus-
 sissent, ou plustost à nous heu-
 reusement . Que de fois aux ha-
 zards , que de fois aux rencontres,
 que de fois aux batailles rāgees? Se-
 uere disoit que la guerre se faisoit,
 non des pieds mais de la teste. Mais
 ce valeureux Prince la faisoit de la
 teste, & des mains & des piez. Vous
 le sçauiez , Noblesse genereuse , qui
 auez eu l'honneur & le contente-
 ment de vous rendre sous luy, l'es-
 froy de l'Vniuers. Combien de
 fois vous l'auiez veu à la teste des es-
 cadrons , au milieu de tant de pe-
 rils , que pour la legitime affection
 que vous luy auiez, vous trembliez
 tous pour luy, & luy seul , cōme s'il
 n'eust sçeu que c'estoit de danger,
 n'en estoit aucunement esmeu , se
 promettant tousiours qu'à la pour-

suite d'une si iuste cause , Dieu
le tiendrait à l'abbry de sa fa-
ueur , comme aussi il faisoit. Mais
d'où donc seroit sortie vne si
mal-heureuse resolution , puis
que le Ciel & la terre la desad-
uoient ? Homere , tu te trompe,
& fais tort à ton Iupiter de placer
à sa porte vn vaisseau pour le bien,
& vn autre pour le mal , si par le
mal tu entends le peché. La diuini-
té sera bien tousiours la source des
biés , mais elle qui ne souffre aucun
defaut , ne produira iamais le mal.
Les effects de ceste grande cause , ne
sont point vains , & le mal est vn
neant , & vne pure priuation qui
n'a point d'estre. Quoy ! chercher
en la Diuinité la cause d'une mes-
chanceté si extreme , ce seroit faire
trop de tort à ceste bonté infinie,
qui a ses creatures si cheres , entre
ses creatures, l'homme produit à sa

H A R E N G V E

semblance , entre les hommes le
Chrestien, entre les Chrestiens ceux
qu'il honore de ses sacrez lis pour
les conduire, & entre ceux-là, celui
qu'il auoit si auantageusement fa-
uorisé, que nous ne sçauons si de-
puis qu'il luy a mis le sceptre en
main, il luy a plus donné de iournees
qu'il n'a fait naistre de merueilles en
sa faueur. Et le moyen de dire qu'il
ait esté l'autheur d'un forfait si ex-
treme? Si quelqu'un le disoit, il au-
roit S. Augustin à combattre, qui
dit de ceux qui auroient de si per-
nicieuses opinions qu'ils font vne
iniure nompareille à Dieu , de-
dans le sacré Senat duquel ils
croient tels crimes estre resolu :
Que s'il y auoit vne ville au
monde qui les eust deliberez ,
tout le monde deuroit porter le
tison pour la reduire en cen-
dres. Ce malheur donc que nous

*Magnā
Deo fa-
ciunt in-
iuriam, in
cuius cla-
rissimo se-
natu, ac
splendi-
dissima
curia, ar-
bitrantur
scelera fa-
ciēda de-
cerni qua-
lia si ali-
qua terre.
na ciuitas
decreuisset
genere hu-
mano de-
cernente
fuerat e-
xertenda.*

pleurons , sans le pouuoir assez
pleurer, ne peut auoir autre origi-
ne que l'Enfer. Ha monstre ! ton
cœur deuoit estre la sentine de ce
que l'Enfer a de plus affreux , pour
te faire entreprendre vn acte si
meschant ! Mais, Dieu, pourquoy
l'avez vous permis ! Et vous sans
la permission duquel les malheu-
reux esprits n'osent seulement tou-
cher les troupeaux de Iob , com-
ment avez vous souffert vn si grád
mal nous arriuer ? Que n'avez-vous
fait ouurir la terre , pour engloutir
ce meschant , ou du moins , que ne
luy auez-vous retenu le bras , ou
diuertý sa malheureuse volonté ?
Ha ! ce sont nos pechez qui nous se-
parant de vous , nous ont priuez
de vos graces. Et ce nous estoit vne
fauorable grace de viure sous l'Em-
pire de ce Prince element : c'estoit
vous qui l'auiez remply de tant &

HARANGVE

si rares perfections , & qui nous faisiez viure si doucemēt sous luy, & l'eussiez fait encores , si nos pechez plus enormes que iamais , ne fussent montez au comble de toute impieté, pour vous prouoquer à courroux. Ha! qu'il failloit bien que nous vous eussions estrange-ment offensé , puis que vous nous auez si rigoureusement punis ! Ha Paris, nous nous moquions des punitions ordinaires : les pestes, les guerres, les famines, n'ont pas eu pouuoir de nous donner le moindre sentiment de nos fautes, il nous failloit vn chastiment plus grand ! Et aussi à ce coup Dieu nous a bien sçeu prendre par la partie la plus sensible , & verser sur nous vne peine plus grande que ne feroient toutes ensemble, la peste, la guerre, & la famine. Car si la peste estoit à tous les coings, & au mi-

lieu de la France, la guerre & la fa-
 mine de mesme, pour y faire mou-
 rir les hommes à milliers, du moins
 ce qui resteroit iouïroit de la vie :
 Mais en ce coup, la vie commune
 de la France luy estant enleuee,
 tous les hommes qui restent en el-
 le, se peuuent plus iustement dire
 morts que vifs, & aussi ce coup es-
 trange a esté permis, non pour le
 mal de ce valeureux Prince (qui
 auoit assez vescu pour luy,) mais
 pour le nostre, il sort des peines, &
 nous y entrons: Ie dis des peines de
 ceste vie presente, & nous ayât per-
 du nostre appuy restons comme
 des brebis sans pasteur, & le comble
 de nostre desastre est, que c'est nous
 mesmes qui sommes la cause de no-
 stre mal, le souffle de nostre bou-
 che, & celuy par lequel nous
 respirions, & pour lequel nous sou-
 spirons, l'oinct du Seigneur a esté

Spiritus
oris no-
stri Chri-
stus Do-
mini cap-
tus est in

H A R A N G V E

*peccatis
nostris,
cui dixi-
mus in
umbra
tua uiue-
mus in
gentibus.*

pris & atteint en nos pechez ,
celuy auquel nous disions , nous
viurons sous vostre ombre par-
my toutes les nations . Ce n'est
pas d'auourd'huy que le pe-
ché commence à faire ces ra-
uages , nostre premier parent , &
tous ce que nous sommes en luy a-
uons assez experimenté combien
de malheur ceste furie, charrie apres
soy, qui l'auroit veu auparauant le
peché, & le verroit apres , ne le co-
gnoistroit plus . Car celuy qui estoit
si sçauant que de pouuoir imposer
les noms à toutes les choses du mô-
de, ce qui ne se fait qu'en ayant vne
pleine cognoissance , puisque les
noms sont les images de nos con-
ceptions , & nos conceptions les
images des choses : Si puissant qu'il
commandoit comme vn vray lieu-
tenant de Dieu à tout ce qui estoit
dans ce bas monde , & qui outre
tout

tout cela auoit le pouuoir de ne
 mourir point, Dieu ayant mis le
 fruiet de vie au milieu du Paradis
 qui auoit la vertu de reparer l'hu-
 mide radical à l'esgal de ce que la
 chaleur naturelle l'alloit diminuât,
 & consequemment le garantir de
 deschet: se vit en vn moment par
 l'effet du peché, de Maistre qu'il e-
 stoit du Paradis terrestre, Seigneur
 de la terre, bourgeois du Ciel, do-
 mestique du Dieu des armées, frere
 des Esprits bien-heureux, & heri-
 tier avec eux des celestes vertus,
 dict saint Bernard, semblable à *Conuer-*
 vne beste brute, n'ayant plus ny *sum in si-*
 force pour se defendre, tant s'en *militudi-*
 faut qu'il en eust pour commander *nem vitulū*
 à tout: ny iugement pour se con- *comeden-*
 duire, bien loin d'en auoir pour *tis fœnura*
 gouverner l'vniuers: & outre tout *quantum*
 cela si subiet à la mort, qu'il ne peut *mutatus*
 faire vn pas qu'il nes'en approche: *ab illo.*

HARANGVE

& qui a causé vn si estrange changement que le peché? Peché donc que l'on deuroit fuyr plus que cent mille pestes, puis que l'on le void si malheureux que de renuerfer les villes, bouleuerfer les Estats, voire le mode tout entier, & ce qui nous est & de plus tragique, & de plus sensible, nous rauir nostre Prince, nostre grand Henry que nous auions si cher! Ah! i'ay horreur de le dire, comment est tombé ce genereux Monarque, le souffle de nostre bouche, l'oint du seigneur a esté pris en nos pechez. Si nous eussions vecu cōme nostre deuoir portoit, & que nous n'eussions par nos horribles crimes excité les plus fortes violences du courroux de nostre Dieu nous l'auiōs encores. Car la nature que Pline disoit estre plustost maistre del'homme que sa naturelle mere, nous estoit en ce poinct trop

*Horresco
referens.
Quomodo
cecidit po-
rens qui
saluum
faciebat
populum
Israel spi-
ritus oris
nostri
Christus
Domini
captus est
in pecca-
tis nostris.*

plus naturelle que nous mesmes, lui
 entretenant vne santé si entiere, &
 toutes les parties de son corps si sai-
 nes, que si la violéterage de ce mō-
 stre, ou plustost de nos forfaitts ne
 l'eust forcé de nous abandonner,
 l'on a iugé que nous en pouuions
 encores iouyr vingt cinq ou trente
 ans. Ah! perte nō pareille! France
 que fusses-tu deuenue sous vn Prin-
 ce que Dieu auoit rendu si valeu-
 reux, que toute la terre trembloit
 au recit de son nom! Les lettres sain-
 ctes nous font foy que Dieu ayant
 choisi Saül pour cōducteur de son
 peuple, lon le veid aussi tost changé
 en vn autre homme, & si maie-
 stueux, qu'il surpassa des espaules en
 haut tout le reste de la troupe: Mais
 qui n'a veu vne si grande Majesté
 reluire dans le front de ce genereux
 Prince, qu'arriuant en sa Cour, & le
 voyant au milieu de tous ceux qui

*Muta-
tum in a-
lium vi-
rum Al-
tior appa-
ruit cun-
ctis ab hu-
meris &
sursum.*

H A R A N G V E

auoient l'honneur de l'accompagner l'on n'estoit point en peine de demander qui estoit le Roy. Qui n'a veu en lui, non vne grandeur de corps, mais d'esprit & de courage si extreme, que la fortune mesme que les autres redoutent, estoit forcee de ceder à sa valeur, si qu'il lui pouuoit dire, comme, voire plus iustement qu'un autre Seneque, tu as à faire à un homme de courage, cherche quelque failly de cœur que tu puisses vaincre: car combien de fois l'auons nous veu venir aux mains contre elle? Si toutesfois il y en auoit pour luy ou contre luy, Mais non, ce Roy Tres Chrestien fouloit aux pieds toutes ces resueries, & aussi il auoit trop de iugement pour s'y arrester. Le Philosophe dit que où il se trouue beaucoup d'entendement la fortune n'a gueres de lieu, qui est à dire. Qu'un beau iuge-

*Cum viro
tibi nego-
tium est,
quare quē
vincas.*

*Ibi plu-
rimum de
intellectu,
ibi mini-
mum de
fortuna.*

ment ſçait bien aller de telle ſorte
au deuant des euenemens qu'il arri-
ue fort peu qu'il ſoit ſurpris. Ce que
ie croirois quand ie n'aurois autre
exemple que de celuy que nous
pleurons. Car quand l'a t'on veu
ſurpris? Mais quand ne l'a t'on pas
veu par vne admirable preuoyance
aller de bien loin au deuant des e-
uenemens qui pouuoient ſurue-
nir? Vn ancien a dit qu'il eſtimoit
les Prouinces heureuſes auſquelles
les Roys philoſophoient où les Phi-
loſophes regnoiēt: Ah France! qu'il
t'eust eſtimee heureuſe ſous l'Em-
pire de ce Prince qui philoſophoit
ſi heureuſement, nō pour ſ'eſtre ad-
onné à vne Philoſophie cōtenticie-
ſe, c'eſtoit trop peu pour luy: mais
ayant atteint par ſon beau iugemēt
le vray but de la ſaine Philoſophie,
qui eſt de cognoiſtre les effects, par
& dedans les cauſes, c'eſt ce qui le

H A R A N G V E

faisoit aymer des vns, redouter des autres, & admirer de tous. C'estoit ce qui le rendoit, ie ne sçay si meilleur en paix, ou en la guerre, mais ie sçay bien que tousiours admirable & en l'une & en l'autre. C'est ce qui le faisoit bon à soi-mesme, meilleur à nous, & très-bon enuers Dieu : C'est ce qui luy apprenoit que les sentimens de pieté & de Religion doiuent tousiours obtenir la maistresse place dedans les cœurs, & aussi l'on a veu quel sentiment il en auoit. Ha que de fois au recit de quelques vnes des merueilles de la bonté de Dieu, on luy a veu tomber les grosses larmes des yeux ! Et que l'on ne die plus que pleurer pour ce suiet est vn tesmoignage, de defaut de courage, l'on ne dira jamais ce genereux Prince en auoir manqué. C'estoit vn sacré zele, & vne sainte affection qu'il auoit à la

vraye pieté, qui le transportoit, de sorte qu'il sembloit s'oublier soy-mesme, quand on le mettoit sur ces considerations. Ses faicts, & ses paroles le iustificient: ses paroles ne firent-elle pas dire à vn souverain Pontife & pere commun des Chrestiens apres auoir leu vne des lettres qu'il luy escriuoit, Voila des lettres d'un Roy Tres-Chrestien, & fils aîné de l'Eglise, transporté qu'il estoit du contentement qu'il receuoit de voir ce Prince si zélé à la deffence de la Religion. Ses effects, ses actiōs, ie ne sçay si plus genereuses que pieuses, ont-elle pas en faueur de la pieté ruiné deux furies, la guerre de-là les Monts, & l'heresie deçà, par l'entremise de ces deux grands Cardinaux que la France cherit, que tout le monde honore, & admire tout ensemble. Vous entendez bié que ie parle de la reconciliation de

H A R A N G V E

ceste grande Republique de Vèni-
 se avec le saint Pere, & de la confe-
 rence de Fontainebleau, actions où
 ce Prince a faict paroistre tant de
 pieté que tout l'Eglise en a receu
 vne ioye admirable. Paris, tu le
 sçais bien que la pieté n'a esté long
 temps auparauant si ardente chez
 toy, qu'elle l'a esté sous le regne de
 ce Prince: tu le sçais, tu le vois, que
 de temples, que de maisons de pie-
 té basties à l'entour de tes murailles,
 plus que tu n'en auois veu esleuer
 deux & trois cents ans aupara-
 uant, & que l'on ne die pas qu'ils
 n'ont esté bastis de ses deniers c'e-
 stoient assez les siens, puisque
 sans luy on ne les eust pas euz. Mais
 comment n'eust-il pas esté porté
 d'extreme affection, à ce que si sain-
 ctement, & si sincerement il ado-
 roit, que mesme l'on ne l'en a ia-
 mais veu manquer pour ses enne-
 mis.

mis. Quelle douceur, quelle bonté,
n'ont-ils pas esprouué en luy? Ha
ils ne l'eussent osé esperer telle! Da-
rius disoit qu'il s'estimoit heureux
en son defastre, de tomber sous les
armes victorieuses d'Alexandre, &
resigner son estat & sa vie entre les
mains d'un Prince si clement: Mais
s'il eust cogneu nostre HENRY,
sa douceur, sa clemence, toutes les
courtoisies d'Alexandre lui eussent
esté de fascheuses importunitéz,
car cest autre luy pilloit son pays,
& celuy cy se faisant par sa valeur le
maistre de celuy que Dieu & la na-
ture luy auoient donné, n'a voulu
enleuer la vie qu'à ceux qui ne l'ont
pas voulu garder. Mere de Darius,
tu pleurois plus amèrement la mort
de ce Macedonien que celle de ton
fils, & pourtant il t'auoit fait de grã-
de Reyne que tu estois vne simple
seruante: Que doiuent donc faire

H A R A N G V E

ceux qui voulant priuer ce Prince de ses legitimes possessions, ont esté par luy non seulement remis en la iouyssance de leurs biens, mais mesme d'une bonne partie des siens, s'abôté les ayant nō seulement cōseruez en ce qui estoit à eux, mais mesmes de beaucoup acreus. L'on a vāté la clemēce de Iules Cesar, qui ne sçauoit (a-t'on dit de luy) oublier que les iniures, mais qu'on ne l'estime plus, la grace n'estoit que demie, il en falloit demander le pardon, & faire des amandes: & la clemence Royale de nostre Prince couroit au deuant de ceux qui l'auoient offensé, ne permettant qu'ils demādassent pardō premier que de l'obtenir. Et ce qui en a esté de plus admirable c'est que cōme le Soleil au plus haut de son eleuation marche plus lentement comme s'il vouloit donner le loisir aux choses

naturelles de prendre de ses influē-
 ces, qui sont alors plus fortes, tout à
 leur aise: ainsi ce grand Monarque
 au plus haut de ses grandeurs a faiēt
 paroistre encor plus de douceur
 que iamais, donnant par ce moyen
 à tous ses subiects la commodité
 de sauouer la douceur de sa Roya-
 le bonté. Pourquoi donc est-ce
 que ce puissant est tombé? Est-ce *Cecidit*
 pour ses valeurs, est-ce pour sa cle- *potens.*
 mence, ou pour le zele ardent & la
 pieté, qu'il auoit au seruice du sou-
 uerain des Roys? Non, ces belles
 qualitez affranchissent de mort, tāt
 s'en faut qu'elles fassent mourir, el-
 les le feront viure malgré la rage du
 peruers qui nous a priuez de sa pre-
 sence. Il est bien vray que personne
 ne peut estre affranchi de la mort
 corporelle, quelque grandeur &
 excellence qui se puisse trouuer en
 vne creature. C'est vn arrest, c'est vn *Statutum*
est omni-

H A R A N G V E

*bus semel
mori.*

*Ego dixi
ty estis &
ilij excelsi
mnes: vos
ntem si-
ut homi-
es morie-
mini, &
icut vnus
le Princi-
ibus ca-
eris.*

decret irreuocable que tous les hō-
mes meurent, & si quelqu'vn entre
eux eust deu estre affranchi de ceste
rigoureuse sentence; ie ne croy pas
que la France n'eust tousiours eu
son HENRY. Mais quoy quand on
seroit si grand que de sembler des
Dieux, l'on ne seroit exempt de la
rigueur de ce sort, commun à tous
les hommes. Celuy qui a esté grand
Roy & grand Prophete tout en-
semble nous le dit en ces termes: Je
dis si vous voulez que vous estes
tous Dieux: ayez si bonne & si for-
te opinion de vous que vous vou-
drez, & que tout le monde vous
aye en telle estime que iamais vos
pareils ne se soyent veuz au iuge-
ment de tous: tout cela ne vous
peut affranchir de la mort, vous
mourrez comme les autres hom-
mes, & tomberez ainsi que ces
grands Princes que les siecles pas-

sez ont admirez. L'on appelloit la
 sepulture de Iosué la maison du so-
 leil, & ceux qui en recerchent plus
 particulieremēt la raison disent que
 mettant ce grand homme sous la
 rumbe, l'on graua sus sa sepulture
 la figure du soleil, voulant dire que
 celuy qui auoit eu le pouuoir d'ar-
 rester le Soleil, n'auoit pas sceu ar-
 rester les traicts de la mort. Ce n'est
 donc pas merueille que nostre Prin-
 ce soit mort, & aussi ce n'est pas ce
 qui me peine, mais qu'il soit mort
 d'une si cruelle & malheureuse sor-
 te que nous puissions facilement iu-
 ger que l'Oinct du Seigneur a esté
 pris en nos pechez. Ha c'est mon
 desplaisir, c'est ce qui nous doit ar-
 racher les plus cuisants regrets; c'est
 pour cela que nous deuons inces-
 samment pleurer, non pour la perte
 de ceste ame genereuse que ie ne
 tiendray iamais perdue, puisque el-

*Christus
 Domini
 captus est
 in peccatis
 nostris.*

H A R A N G V E

Unus pa- le a eu le bien de viure en la creance
nis & v- de celuy qui nous fait viure apres la
num cor- mort, & sauouer le pain qui nous
pus multi faisant tous vn corps avec la mesme
sumus, o- vie, ainsi que dit S. Paul, nous donne
mines qui les assurances de triompher tous-
de vno pa- iours de la mort, voire dans la mort
ne & de mesme qui ne peut atteindre que
vno Cali- l'escorce du Chrestien, sans iamais
ce partici- pouuoir penetrer ce qu'il a de meil-
pamus. leur, qui est ce bel esprit image du
 grand Dieu qui se reioint à luy par
 le moyen de sa grace, à l'heure que
 le corps pour vn temps s'en retour-
 ne à la terre. Le Sage ne vouloit que
 l'on pleurast tous les hommes esga-
 lemēt. Le dueil, dit-il, que l'on fera
 pour les morts ordinaires durera 7.
 iours, mais pour les insensez, il doit
 esgaler tous les iours de leur vie,
 voulant ce sage Prince dire que cō-
 me les personnes auoient vescu de
 telle sorte que l'on les pouuoit es-

Luctus
mortui
septem
dies, fatui
autem &
stulti om-
nes dies
vite eo-
rum.

perer deuoir viure apres la mort,
l'on ne les deuoit pleurer si longue-
mēt: mais pour ceux de qui la vie ne
donnoit esperance de bien apres la
mort ils deuoient estre pleurés à l'egal
du tēps qu'ils auoient vescu, attendu
que tout le tēps qu'ils auoient eu de
vie auoit esté perdu. Or ne ressetōs
nous que trop que les iours que dieu
a donné à nostre Prince en ce mon-
de n'ont pas esté tels, pourquoy ie
ne tiēs pas que nous le deuiōs pleu-
rer sans mesure: & aussi quand ie le
considere deliuré des miseres de
ceste vie presente, & en estre parti
en Roy Tres-chrestien, ie ne reçois
pas peu de consolation en mon en-
nuy. Car ceux qui meurent en ceste
sorte, ne meurent qu'à la mort &
aux miseres, & viuēt à la vie & aux
contentemens. Ie sçay qu'on peut
estre aucunement affligé de ce que
ce meschāt ne luy a donné du moins

H A R A N G V E

le loisir de nous iustifier en sa mort
 ce qu'il auoit esté en sa vie, mais lon
 se doit cōsoler sur ce que son esprit
 plus souple & plus maniant que les
 corps les pl^r subtils du mōde a peu
 en vn clein d'œil par vne affectiō ar-
 dēte & regret d'auoir offēsé sō Dieu
 se reünir à luy. Et il n'est pas croya-
 ble que ceste ame si tendre à ce qui
 regardoit la Religiō sainte que Dieu
 luy auoit fait cognoistre, & qui aux
 moindres perils estoit si prompte à
 retourner à Dieu, ait manqué d'vn
 effort au moyē duquel elle ait cōuē
 la diuine bonté de la receuoir en sa
 grace à l'heure la plus necessaire: &
 Dieu qui se cōtente de nos affectiōs
 quād le pouuoir nous est desnié de
 produire des actions exterieures, &
 qui ne voit iamais la porte de nos
 cœurs ouuerte qu'il ne s'y place,
 n'aura pas manqué de s'introduire
 dedans ceste ame, l'embellir de sa
 gra-

grace, & l'honorer de son alliãce sa-
 cree pour la faire viure & regner en
 tre les immortels. Nõ que ce soit pa-
 rauãture si tost qu'elle doiue iouyr
 de ce sacré bõ heur: la iustice infinie
 de celuy qui par sa misericorde re-
 çoit les ames en sa grace, quand elles
 retournēt à luy, demãde que les fau-
 tes que l'infirmité nous a fait cõmet-
 tre soiēt auparauãt chastiees s'il s'en
 trouue. Or en ce poinct le pourront
 nous secourir par ieusnes, par prie-
 res, par aumosnes, & nous le deuõs
 par tous les droits du mōde, & le fe-
 rons si nous ne voulons estre tenus
 pour les plus denaturez que iamais
 le ciel ait veuz. Rẽdõs dirai-ie (cõme
 S. Ambroise disoit de sō Theodose)
 à ce Prince les deuotes larmes que
 les obligatiõs que nous lui auõs de-
 mādēt de nous, puisque pour nous
 il n'a pas espargné sa propre vie, fai-
 sant tãt enuers la diuine bõté, qu'el-
 le le place si s'elle ne l'a desia fait, en

*Soluamur
 pio Prin-
 cipi stipē-
 diarias
 lachrimas
 quia ille
 soluit nobis
 etiam sua
 mortis sti-
 pendium.*

H A R A N G V E

lieu où nous le puissions vn iour re-
 uoir couronné de la gloire immortel-
 le, ou estant que ne pourra-il pour
 nous? Ainsi s'il est mort à la terre, il
 sera viuant au Ciel, & si nous auons
 perdu vn Roy mortel, nous aurons
 vn Roy immortel. Cōsolōs nous en
 ces esperāces, rendāt cepēdāt ce que
 nous deuōs (nō nous ne le sçauriōs)
 mais ce que nous pourrons à ce va-
 leureux Prince qui nous a tāt aimés,
 Rēdōs les deuotiōs interieures & ex-
 terieures à Dieu pour le repos de ce-
 luy qui nous fait encor iouyr de la
 paix apres sa mort. C'est vne vanité
 ce q̃ l'ō dit de Thesee qu'à la bataille
 de Maratō son image parut, & dōna
 aux Grecs le moyen d'obtenir la vi-
 ctoire, mais il est vray que le souue-
 nir de cet aimable Prince nous en-
 tretient encor le calme dont nous
 iouyssons: & qui ne voudroit donc
 luy rendre tout ce qui seroit en son
 pouuoir? Qui seroit le courage si

malheureux qui ne le voulust honorer & seruir en ce qui nous reste de luy? Ha Dieu que vous auez obligé la France de luy auoir donné du fruit de ce grand Roy! Quel bonheur ce nous fut, que ceste pieuse & illustre Princeesse luy fust iointe par vn sacré mariage. On a bien celebré par les siecles passez la poulle blanche que l'aigle volât laissa tóber dedás le sein de Liuia tenát vn laurier en son bec: mais ce n'estoit rien au regard de la faueur que la France a receuë quand elle a veu dedans son sein ceste blanche Princeesse, de qui la fecondité nous a produit les lauriers d'vne gloire immortelle. Dieu promettoit à l'homme qui le voudroit deuotemét seruir, que sa femme seroit comme vne vigne fertile, de qui l'ombre & le fruit honorerait sa maison, que ses enfans seroiēt comme des surgeōs d'oliuier à l'entour de sa table. Et nous voyons par

*Uxor eius
sicut vitis
abundans
in lateri-
bus domus
eius. Filij
eius sicut
nouelle o-
linarum.*

H A R A N G V E

la grãde bõté de Dieu nostre grãde
 Princesse cõme vne belle vigne re-
 creer par ses fruits delicieux & le ciel
 & la terre. Astiages voyoit vne vi-
 gne qui sortant de sa fille couuroit
 toute l'Asie (mais ce n'estoit qu'en
 songe) & nous voyons sans songer
 vne fecõde vigne dõt les vertus & la
 fecondité font vne telle ombre à
 nostre Frãce que i'ose dire que sans
 elle en vn si grand desastre tout cest
 estat estoit perdu. Mais cette grãde
 Reyne qui estoit la chere moitié de
 nostre Prince semble auoir en effet
 retenu ce genereux esprit, qui si heu-
 reusẽment nous a gouuernez. car cõ-
 ment eust elle peu faire autrement ce
 quel'on luy a veu faire depuis no-
 stre perte? Cõment faire trefue avec
 ses soupirs pour dõner ordre à tant
 d'affaires, avec si grãde prudẽce? cõ-
 ment se denier ce qu'elle deuoit à
 soi-mesme, pour se dõner toute en-
 tiere au bien & à la conseruation de

tout ce que nous sommes, s'elle n'a-
 uoit en soi bõne partie de l'esprit de
 ce Prince qui viuoit plus pour ses
 subiects que pour luy? Honorõs les
 tous deux, & en eux, & en ces belles
 ames que Dieu nous a donnees par
 eux, particulierement en celuy que
 Dieu a voulu estre son successeur au
 gouuernement de ceste puissante
 monarchie. Je dirai pour eux ce que
 S. Ambroise disoit pour les enfans
 du gād Theodose. La loyauté & bõ-
 ne foy de vostre grād HENRY a esté
 vostre victoire, que vostre loyauté
 ô bõs Frāçois soit l'apuy & le main-
 tien de ses enfans. Daud ne se pou-
 uoit rassasier de voir Miphibozet,
 quoy qu'il fut cõtrefait, pour l'affe-
 ctiõ que lui auoit portee son bõ ami
 Ionatas: mais quelle cõparaïson ya-
 il entre les obligations que Daud
 pouuoit auoir à Ionatas, & celles
 que nous auõs à ce grād Prince, qui
 malgré nous, nous a tirez du naufra

*Theodosij
 fides fuit
 vestra vi-
 ctoria, ve-
 stra fides
 filiorum
 eius sit
 fortitudo.*

H A R A N G V E

ge? Ayōs dōctoufiours les enfās au cœur, rendōs-leur toute nostre vie vn sacré respect, qu'ils māgent toufiours du pain à nostre table, ie veux dire qu'aux plus ardētes affectiōns qu'il plaira à Dieu nous inspirer, ils soient toufiours les premieres partis. Demādōs à Dieu qu'il lui plaise cōseruer cet Estat, nous garder nostre Reyne, l'assister de ses graces, faire croistre pl⁹ en vertu qu'en âge l'image de ce grād Prince qui porte aujourd'huy son sceptre, tous nos Seigneurs & Dames ses freres & sœurs. Que tous les Princes & Seigneurs puissent saintemēt cōspirer & nous tous aussi à rédre au Roy & à l'Estat ce qui luy est deu, à ce que puisse toufiours viure la paix que le Ciel nous auoit donnee sous le regne de celuy dont nous pleurons la mort, & pour qui nous prions.

O Dieu qui nous auiez par vostre singuliere bōté donē vn Prince

si valeureux, si clemēt, & tant religieux, & qui pour nos pechez auez permis qu'il fust si miserablemēt & malheureusemēt enleué: Faites que sō esprit qui a tousiours esté l'esprit de tout ce que nous sommes, iouisse du repos que la creāce sincere qu'il vous a pleu luy inspirer, luy a tousiours fait esperer & desirer. Que si vostre iustice voit quelque chose en luy pourquoy il deust endurer quelques peines, prenés les sur nous tous. Nous vous en suppliōs, & affranchissez de toutes douleurs celui qui a tāt & si longuement trauaillé pour nous. Versez Seigneur, les plus rares faueurs de vostre misericorde sur luy, & vos plus aduantageuses graces sur sa chaste espouse nostre pieuse Reyne, sur nostre Roy son fils, & tous ses autres enfans, les faisant prosperer, nous viure sous eux en vne paix durable, attendant

HARANGVE FVNEBRE.
qu'eux & nous ayons le bien d'e-
stre avec nostre Prince, iouyssans
du repos eternel.

Extrait du Priuilege du Roy.

Par grace & Priuilege du Roy, il est permis à François Huby, maistre Imprimeur, & Marchand Libraire en en l'Vniuersité de Paris, d'imprimer ou faire imprimer & exposer en vente vn liure intitulé, *Harangue funebre, prononcee à Paris en l'Eglise de S. Merry, au seruice de HENRY IIII. Roy de France & de Nauarre, Prince incomparable. Par F. N. DESLANDES, Docteur, Regent en Theologie, de l'ordre des Freres Prescheurs.* Et ce iusques au terme de six ans finis & accomplis, à compter du iour que ledit liure sera acheué d'imprimer. Pendant lequel temps, defences sont faites à tous Imprimeurs, Libraires, & autres de quelque estat qualité où conditions qu'ils soient, de non imprimer, vendre, contrefaire, ou alterer ledit Liure, ou aucune partie d'iceluy, sur peine de confiscation des exemplaires, & de quinze cens liures d'amende applicables moitié au Roy, & moitié aux pauvres de l'hostel Dieu de ceste ville de Paris, depens dommages & interest: Non-obstant toute Clameur de Haro, Charte Normande, Priuileges, lettres, ou autres appellations formées à ce contraires faites ou à faire. Donné à Paris le 14. Iuillet, 1610. Et de nostre regne le premier.

Par le Roy en son Conseil

Signé, DV LIS





